

լողացնել: Այս էլ սակայն հնում երևի չէր թույլ տրվում: Տանից ննջեցյալին դուրս էին տանում կանայք, ինչպես և լողացնելուց հետո, եթե ննջեցյալը անմիջապես չէր փոխադրվում եկեղեցի, կրկին կանայք էին նրան ներս բերում: Սա թվում է թե նորից մի արձագանք է մայրիշխանություն, երբ կինն էր գրախց մարդ ընդունողն ու ճանապարհ դնողը:

Ամեն կերպ աշխատում էին, որ ննջեցյալից հեռացվող կեղտը չդիպչի անմիջապես գետնին: Այդ նպատակով նրան պառկեցնում էին տախտակների վրա մի տաշտ տակին զետեղելով: Նույնիսկ այն կուժը, որի մեջ աղբյուրից բերած ջուրը աղէր՝ քահանան օրհնում էր, չպիտի դիպչեր գետնին: Այդ կուժը հետո մինչև օխտը՝ յոթերորդ օրը մահվանից հետո, չպիտի գործածվեր, իսկ այն ամանները, որոնցով ջուրն էր ածվում ննջեցյալի վրա, պիտի կոտորվեին: Տղամարդուն լողացնում էին տղամարդիկ, կին-մարդուն՝ կանայք: Լողացնողները պետք է ձեռներին քսակներ կամ սավանից մի կտոր անցկացնեին և վերջը այդ ձեռնոցները կամ կտորը դուրսը չթողնեին, այլ դնեին նրնջեցյալի սեռական անդամի մոտ: Լողացնելուց ավելացած օրհնված ջրով լվանում էին տանեցոց և գյուղում եղած հիվանդների ոտները—տանեցիներին մահվան մերձենալուց առաջացած վախից ու վշտից, իսկ հիվանդներին՝ հիվանդությունից, որը առաջ է գալիս շար ոգու մերձենալուց, լվանալու նպատակով: Բոլոր այս մոզական արարողությունները նման են այն միջոցառումներին, որոնցով, օրինակ՝ Սիբիրի շամանները հեռացնում էին հիվանդությունը մարդու վրայից, օրինակ՝ ծծելով և դեն թքելով հիվանդությունը:

Լողանալուց հետո ննջեցյալին պատանքում էին: Սիսիանում այս սովորությունը պատճառաբանում էին նրանով, իբր թե՝

«Առանց պատանքի չի կարելի ներկայանալ Քրիստոսին»:

Սակայն ճշմարտությունն ավելի մոտեցող բացատրությունը պիտի լինի այն, որ այդտեղ պահպանվել է նախնական մտայնության հետքը, որով թաղումը նկատվում էր որպես վերադարձ մայր երկրի արգանդը, իսկ մոր արգանդում երեխան լինում է ընկերավ պատված: Այս պատանքը երեխայի ընկերի սիմբոլացումն էր:

Պատանքված ննջեցյալին փաթաթում էին մի կարպետի մեջ և դնում եկեղեցուց բերած համայնական պատգարակի՝ նաժի վրա: Վերջին տանամյակներում սկսել էին դնել դագաղի մեջ առանց կարպետի, երբեմն մերկ, բայց պատանքված, ավելի հաճախ նաև ամբողջ հանդերձանքով: Եթե նաժը տանում էին ոչ թե դիակը լողացնելու տեղից, այլ կրկին տուն ներս տանելուց հետո, նաժը տանից դուրս հանելիս, այս անգամ տեղից վերցնում էին տղամարդիկ, դուռը երեք անգամ փակում և երեք անգամ բացում էին⁸⁸ կամ փակած դռանը երեք անգամ նաժը զարնում էին: Սա թույլ հիշատակ է հնում Հայաստանում ևս տարածված իրանական-գրադաշտական սովորության⁸⁹, որը պահանջում էր ննջեցյալին տանից դուրս հանել ոչ թե դռնով, որով կատարվում էր ամենօրյա երթ և եկը, այլ պատի մեջ քանդած բացվածքով. նա հետո նորից վերաշարվում էր: Այս անում էին այն մտադրությամբ, որ, եթե

⁸⁸ Արծվանիկ:

⁸⁹ Ննջեցյալին ոչ թե դռնով, այլ հատուկ շինված բացվածքով տանից դուրս տանելը ընդունված է նաև Հյուս. Ամերիկայի էսկիմոսների և հնդկացիների, Աֆրիկայի հոտանետատների, բուշմենների, կիմբունդա և այլ ժողովուրդների մեջ, Հնդկաստանում, Ֆիջի և Բալի կղզիների վրա, սամոնդների, տունգուլների, հին շինացիների մոտ, մինչև այսօր էլ Դանիայում: